

四庫全書

集部

欽定四庫全書

集部

御定全唐詩卷四百五十二至五

詳校官庶吉士臣胡鈺

主事銜臣徐以坤覆勘

總校官知縣臣繆琪

校對官助教臣羅萬選

謄錄監生臣姚培敦

欽定四庫全書

御定全唐詩卷四百五十二

白居易

詠興五首

并序

七年四月予罷河南府歸履道第廬舍自給衣儲
自充無欲無營或歌或舞頽然自適蓋河洛間一
幸人也遇興發詠偶成五章各以首句命為題目

解印出公府

解印出公府斗數塵土衣百吏放爾散雙鶴隨我歸歸
來履道宅下馬入柴扉馬嘶返舊櫪鶴舞還故池雞犬
何忻忻隣里亦依依年顏老去日生計勝前時有帛禦
冬寒有穀防歲饑飽於東方朔樂於榮啟期人生且如
此此外吾不知

出府歸吾廬

出府歸吾廬靜然安且逸更無客干謁時有僧問疾家
僮十餘人櫪馬三四匹慵發經旬卧興來連日出出遊

愛何處嵩碧伊瑟瑟況有清和天正當疎散日身閒自
為貴何必居榮秩心足即非貧豈唯金滿室吾觀權勢
者苦以身徇物炙手外炎炎履冰中慄慄朝饑口忘味
夕惕心憂失但有富貴名而無富貴實

池上有小舟

池上有小舟舟中有胡牀牀前有新酒獨酌還獨嘗熏
若春日氣皎如秋水光可洗機巧心可蕩塵垢腸岸曲
舟行遲一曲進一觴未知幾曲醉醉入無何鄉寅緣潭

島間水竹深青蒼身閒心無事白日為我長我若未忘
世雖閒心亦忙世若未忘我雖退身難藏我今異於是
身世交相忘

四月池水滿

四月池水滿龜游魚躍出吾亦愛吾池池邊開一室人
魚雖異族其樂歸於一且與爾為徒逍遙同過日爾無
羨滄海蒲藻可委質吾亦忘青雲衡茅足容膝况吾與
爾輩本非蛟龍匹假如雲雨來祇是池中物

小庭亦有月

小庭亦有月
小院亦有花
可憐好風景
不解嫌貧家
菱

角執笙簧
谷兒抹琵琶
紅綃信手舞
紫綃隨意歌

菱谷紫紅

皆小賦獲名也

邛歌與社舞
客哂主人誇
但問樂不樂
豈在鐘

鼓多客告暮
將歸主稱日
未斜請客稍
深酌願見朱顏

酖客知主意
厚分數隨口

一作後

加堂上燭未秉
座中冠

已我左顧短紅袖
右命小青娥
長跪謝貴客
蓬門勞見

過客散有餘興
醉卧獨吟哦
幕天而席地
誰奈劉伶何

秋涼閒卧

殘暑晝猶長早涼秋尚嫩
露荷散清香風竹含疎韻
幽閒竟日卧衰病無人問
薄暮宅門前槐花深一寸

酬思黯相公見過弊居戲贈

軒蓋光照地行人為褰回
呼傳君子出乃是故人來
訪我入窮巷引君登小臺
臺前多竹樹池上無塵埃
貧家

何所有新酒三兩栝停栝
款曲語上馬復遲迴

一本作款曲語

上馬從客復遲迴

留守不外宿日斜宮漏催
但留金刀贈未接

玉山頽家醞不敢惜待君來即開邨妓不辭出恐君驟
然哈

再授賓客分司

優穩四皓官清崇三品列伊予再塵忝內媿非才哲俸
錢七八萬給受無虛月分命在東司又不勞朝謁既資
閒養疾亦賴慵藏拙賓友得從容琴觴恣怡悅乘籃城
外去繫馬花前歇六遊金谷春五看龍門雪吾若默無
語安知吾快活吾欲更盡言復恐人豪奪應為時所笑

苦一作古

惜分司闕但問適意無豈論官冷熱

把酒

把酒仰問天古今誰不死所貴未死間少憂多歡喜窮
通諒在天憂喜即由已是故達道人去彼而取此勿言
未富貴久忝居祿仕借問宗族間幾人拖金紫勿憂漸
衰老且喜加年紀試數班行中幾人及暮齒朝飧不過
飽五鼎徒為爾夕寢止求安一衾而已矣此外皆長去聲
物於我雲相似有子不留金何況兼無子

首夏

林靜蚊未生池靜蛙未鳴景長天氣好竟日和且清春
禽餘哢在夏木新陰成兀爾水邊坐脩然橋上行自問
一何適身閒官不輕料錢隨月用生計逐日營食飽慙
伯夷酒足媿淵明

陶潛詩云飲酒常不足

壽倍顏氏子富百黔婁

生有一即為樂況吾四者并所以私自慰雖老有心情

代鶴

我本海上鶴偶逢江南客感君一顧恩同來洛陽陌洛

陽寡族類皎皎唯兩翼貌是天與高色非日浴白主人
誠可戀其奈軒庭窄飲啄雜雞羣年深損標格故鄉渺
何處雲水重重隔誰念深籠中七換摩天翮

立秋夕有懷夢得

露簾荻竹清風扇蒲葵輕一與故人別再見新蟬鳴是
夕涼颼起閒境入幽情迴燈見棲鶴隔竹聞吹笙夜茶
一兩杓秋吟三數聲所思渺千里雲外一作水長洲城

哭崔常侍晦叔

頑賤一拳石精珍百鍊金名價既相遠交分何其深中

誠一以合外物不能侵逶迤二十年與世同浮沈晚有

退閒

一作寒

約白首歸雲林垂老忽相失悲哉口語心春

日嵩高

一作高嵩

陽秋夜清洛陰丘園共誰卜山水共誰尋

風月共誰賞詩篇共誰吟花開共誰看酒熟共誰斟
惠死莊杜口鍾歿師廢琴道理使之然從古非獨今
吾道自此孤我情安可任唯將病眼淚一灑秋風襟

新秋曉興

濁暑忽已退清宵未全長
晨釭耿殘焰宿閣凝微香
喔雞下樹輝輝日上梁
枕低茵席軟卧穩身入牀
睡足景猶早起初風乍涼
展張小屏幃收拾生衣裳
還有惆悵事遲遲未能忘
拂鏡梳白髮可憐冰照霜

秋日與張賓客舒著作同遊龍門醉中狂歌凡
二百三十八字

秋天高高秋光清
秋風裊裊秋蟲鳴
嵩峰餘霞錦綺卷
伊水細浪鱗甲生
洛陽閒客知無數
少出遊山多在城

商嶺老人自追逐蓬丘逸士相逢迎南出鼎門十八里
莊店邈迤橋道平不寒不熱好時節鞍馬穩快衣衫輕
竝轡踟躕下西岸扣舷容與繞中汀開懷曠達無所繫
觸目勝絕不可名荷衰欲黃荇猶綠魚樂自躍鷗不驚
翠藻蔓長孔雀尾彩船櫓急寒鴈聲家醞一壺白玉液
野花數把黃金英晝遊四看西日暮夜話三及東方明
暫停柝觴輟吟詠我有狂言君試聽丈夫一生有二志
兼濟獨善難得并不能救療生民病即須先濯塵土纓

況吾頭白眼已闔終日戚促何所成不如展晷開口笑
龍門醉卧香山行

履信池櫻桃島上醉後走筆送別舒員外兼寄

宗正李卿考功崔郎中

櫻桃島前春去春花萬枝忽憶與宗卿閒飲日又憶與
考功狂醉時歲晚無花空有葉風吹滿地乾重疊蹋葉
悲秋復憶春池邊樹下重殷勤今朝一酌臨寒水此地
三迴別故人櫻桃花來春千萬朵來春共誰花下坐不

論崔李上青雲明日舒三亦拋我

秋池獨汎

蕭疎秋竹籬清淺秋風池一隻短舫艇一張斑鹿皮皮
上有野叟手中持酒卮半酣箕踞坐自問身為誰嚴子
垂釣日蘇門長嘯時悠然意自得意外何人知

冬日早起閒詠

水冰一作塘耀初旭風竹飄餘霰幽境雖目前不因閒不

見晨起對爐香道經尋兩卷晚坐拂琴塵秋思彈一遍

此外更無事開尊時自勸何必東風來一桮春上面

歲暮

慘澹歲云暮窮陰動經旬霜風裂人面冰雪摧車輪而
我當是時獨不知苦辛晨炊廩有米夕爨厨有薪夾帽
長覆耳重裘寬裹身加之一桮酒煦嫗如陽春洛城士
與庶比屋多饑貧何處爐有火誰家甑無塵如我飽煖
者百人無一人安得不慙媿放歌聊自陳

南池早春有懷

朝遊北橋上晚憇南塘畔西日雪全銷東風冰盡泮
筵魚尾掉瞥瞥鵝毛換泥煖草芽生沙虛泉脉散晴芳
冒苔島宿潤侵蒲岸洛下日初長江南春欲半時光共
拋擲人事堪嗟歎倚權忽尋思去年池上伴

古意

脉脉復脉脉美人千里隔不見來幾時瑤草三四碧玉
琴聲悄悄鸞鏡塵累累昔為連理枝今作分飛翮寄書
多不達加飯終無益心腸不自寬衣帶何由窄

山遊示小妓

雙鬟垂未合三十纔過半本是綺羅人今為山水伴春
泉共揮弄好樹同攀翫笑容花底迷酒思風前亂紅凝
舞袖急黛慘歌聲緩莫唱楊柳枝無腸與君斷

神照禪師同宿

八年三一作二月晦山梨花滿枝龍門水西寺夜與遠公

期晏坐自相對密語誰得一作能知前後際斷處一念不

生時

張常侍相訪

西亭晚寂寞鶯散柳陰繁
水戶簾不卷風牀席自翻
忽聞車馬客來訪蓬蒿門
況是張常侍安得不開尊

感白蓮花

白白芙蓉花本生吳江濱
不與紅者雜色類自區分
誰移爾至此姑蘇白使君
初來苦顛賴久乃芳氛氤
月月葉換葉年年根生根
陳根與故葉銷化成泥塵
化者日已遠來者日復新
一為池中物永別江南春
忽想西涼

州中有天寶民埋歿漢父祖亦孳生子孫已忘鄉土戀
豈念君親恩生人尚復爾草木何足云

詠所樂

獸樂在山谷魚樂在陂池蟲樂在深草鳥樂在高枝所
樂雖不同同歸適其宜不以彼易此况論是與非而我
何所樂所樂在分司分司有何樂樂哉人不知官優有
祿料職散無羈縻嬾與道相近鈍將閒自隨昨朝拜表
迴今晚行香歸歸來北窗下解巾脫塵衣冷泉灌我頂

暖水濯四肢體中幸無疾卧任清風吹心中又無事坐
任白日移或開書一篇或引酒一卮但得如今日終身
無厭時

思舊

閒日一思舊舊遊如目前再思今何在零落歸下泉退
之服硫黃一病訖不痊微之鍊秋石未老身溘然杜子
得丹訣終日斷腥羶崔君誇藥力經冬不衣綿或疾或
暴夭悉不過中年唯予不服食老命反遲延況在少壯

時亦為嗜慾牽但耽葷與血不識汞與鉛饑來吞熱物
渴來飲寒泉詩役五藏神酒汨三丹田隨日合破壞至
今粗完全齒牙未缺落肢體尚輕便已開第七秩飽食
仍安眠且進一作盡 栝中物其餘皆付天

寄盧少尹一作卿

老誨心不亂莊戒形太勞生命既能保死籍亦可逃嘉
肴與旨酒信是腐腸膏豔聲與麗色真為伐性刀補養
在積功如裘集衆毛將欲致千里可得差一毫

心不亂
形太勞

至差一毫皆出老莊
及諸道書仙方禁誡
顏回何為者
簞瓢纔自給
肥醲不

到口年不登
三十張蒼何為者
染愛浩無際
妾媵填後
房竟壽百餘歲
蒼壽有何德
回夭有何辜
誰謂具聖體
不如肥瓠軀
遂使世俗心
多疑仙道書
寄問盧先生
此理當何如

池上清晨候皇甫郎中

曉景麗未熱
晨飈鮮且涼
池幽綠蘋合
霜潔白蓮香
深掃竹間逕
靜拂松下牀
玉柄鶴翎扇
銀鬕雲母漿
屏除

無俗物瞻望唯清光
何人擬相訪羸女從蕭郎

詠懷

我知世無幻了無干世意
世知我無堪亦無責我事由
茲兩相忘因得長自遂
自遂意何如閒官在閒地
閒地唯東都東都少名利
閒官是賓客賓客無牽累
嵇康日日嬾畢卓時時
醉酒肆夜深歸僧房日
高睡形安不勞苦神泰
無憂畏從官三十年無
如今氣味鴻雖脫羅戈
鶴尚居祿位唯此未忘
懷有時猶內媿

北窗三友

今日北窗下自問何所為欣然得三友三友者為誰琴
罷輒舉酒酒罷輒吟詩三友遞相引循環無已時一彈
愜中心一咏暢四肢猶恐中有間以酒彌縫之豈獨吾
拙好古人多若斯嗜詩有淵明嗜琴有啟期嗜酒有伯
倫三人皆吾師或乏儋石儲或穿帶索衣弦歌復觴詠
樂道知所歸三師去已遠高風不可追三友游甚熟無
日不相隨左擲白玉卮右拂黃金徽興酣不疊紙走筆

操狂詞誰能持此詞為我謝親知縱未以為是豈以我
為非

吟四雖 雜言

酒酣後歌歇時請君添一酌聽我吟四雖年雖老猶少
於韋長史命雖薄猶勝於鄭長水眼雖病猶明於徐郎
中家雖貧猶富於郭庶子省躬審分何倖倖值酒逢歌
且歡喜忘榮知足委天和亦應得盡生生理 分司同官中韋長史
續年七十餘郭庶子求貧苦甚徐郎中晦因疾喪明
予為河南尹時見同年鄭俞始受長水縣令因歎四子

而成此
篇也

裴侍中晉公以集賢林亭即事詩三十六韻見
贈猥蒙徵和才拙詞繇輒廣為五百言以伸酬
獻

三江路千里五湖天一涯何如集賢第中有平津池池
勝主見覺景新人未知竹森翠琅玕水深同琉璃水竹
以為質質立而文隨文之者何人公來親指麾疏鑿出
人意結構得地宜靈襟一搜索勝概無遁遺因下張沼

止依高築階基嵩峰見數片伊水分一支南溪脩且直
長波碧逶迤北館壯復麗倒影紅參差東島號晨光杲
泉一作曜迎朝曦西嶺名夕陽杳暖留落暉前有水心亭

動蕩架漣漪後有開闔堂寒溫變天時幽泉鏡泓澄怪

石山歌危

以上八所
各具本名

春葩雪漠漠

謂杏
花島

夏果珠離離

謂櫻

桃島主人命方舟宛在水中坻親賓次第至酒樂前後施

解纜始登汎山遊仍水嬉汭洄無滯礙向背窮幽竒
過遠橋下飄旋深澗隔管絃去縹緲羅綺來霏微
權風

逐舞迴梁塵隨歌飛宴餘日云暮醉客未放歸高聲索
彩牋大笑催金卮唱和筆走疾問答栝行遲一詠清兩
耳一酣暢四肢主客忘貴賤不知俱是誰客有詩魔者
吟哦不知疲乞公殘紙墨一掃狂歌詞維云社稷臣赫
赫文武姿十授丞相印五建大將旗四朝致勛華一身
冠臯夔去年才七十決赴懸車期公志不可奪君恩亦
難希一作違從容就中道俛僊來保隆貂蟬雖未脫鸞皇
已不羈歷徵今與古獨步無等夷陸賈功業少二疏官

秩卑乘舟范蠡懼辟穀留侯饑豈若公今日身安家國
肥羊祜在漢南空留峴首碑柳惲在江南祇賦汀洲詩
謝安入東山但說攜蛾舂山簡醉高陽唯聞倒接羅豈
如公今日餘力兼有之願公壽如山安樂長在茲願我

比蒲稗永得相因依

謝靈運詩云
蒲稗相因依

晚歸香山寺因詠所懷

我年日已老我身日已閒閒出都門望但見水與山關
塞碧巖巖伊流清潺潺中有古精舍軒戶無扃闔岸草

歇可藉逕蘿行可攀朝隨浮雲出夕與飛鳥還吾道本
迂拙世途多險艱嘗聞嵇呂輩尤悔生疎頑巢悟入箕
穎皓知返商巔一作顏豈唯樂肥遁聊復祛憂患吾亦從
此去終老伊嵩間

張常侍池涼夜閒讌贈諸公

竹橋新月上水岸涼風至對月五六人管絃三兩事留
連池上酌款曲城外意或嘯或謳吟誰知此閒味迴看
市朝客矻矻趨名利朝忙少遊宴夕困多眠睡清涼屬

吾徒相逢勿辭醉

和皇甫郎中秋晚同登天宮閣言懷六韻

碧天忽已高白日猶未短玲瓏曉樓閣清脆秋絲管張
翰一桮酣嵇康終日嬾塵中足憂累雲外多疎散病木
斧斤遺冥鴻羈縲斷逍遙二三子永願為閒伴

送呂漳州

今朝一壺酒言送漳州牧半自要閒遊愛花憐草綠花
前下鞍馬草上攜絲竹行客飲數桮主人歌一曲端居

惜風景屢出勞僮僕獨醉似無名借君作題目

短歌曲

一作行

世人求富貴多為奉嗜欲盛衰不自由得失常相逐問

君少年日苦學將干祿負笈塵中遊抱書雪前讀布衾

不周體藜茹

一作茹

纔充腹三

一作四

十登宦途五十被朝

服奴溫新

一作已

挾纊馬肥初食粟未敢議歡遊尚為名

檢束耳目聾闇後堂上調絲竹牙齒缺落時盤中堆酒

肉彼來此已去外餘中不足少壯與榮華相避如寒燠

青雲去地遠白日經天速從古無奈何短歌聽一作空一

曲

詠懷

高人樂丘園中人慕官職一事尚難成兩途安可得
遑干世者多苦時命塞亦有愛閒人又為窮餓逼我今
幸雙遂祿仕兼游息未嘗羨榮華不省勞心力妻孥與
婢僕亦免愁衣食所以吾一家面無憂喜色

府西亭納涼歸

避暑府西亭晚歸有閒思夏淺蟬未多綠槐陰滿地帶
寬衫解領馬穩人攏轡面上有涼風眼前無俗事路經
府門過落日照官次牽聯縲紲囚奔走塵埃吏低首悄
不語誰復知茲意憶得五年前晚衙時氣味

老熱

一飽百情足一酣萬事休何人不衰老我老心無憂仕
者拘職役農者勞田疇何人不苦熱我熱身自由卧風
北窗下坐月南池頭腦涼脫烏帽足熱濯清流慵發晝

高枕興來夜汎舟何乃有餘適祇緣無過求或問諸親
友樂天是與不亦無別言語多道天一作悠悠悠悠君
不知此味深且幽但恐君知後亦來從我遊

新秋喜涼因寄兵部楊侍郎

外強火未退中銳金方戰一夕風雨來炎涼隨數變徐
徐炎景度稍稍涼飈扇枕簟忽淒清巾裳亦輕健老夫
納秋候心體殊安便睡足一屈伸搔首摩挲面褰簾對
池竹幽寂如僧院俯觀游魚羣仰數浮雲片閒忙各有

趣彼此寧相見昨日聞慕巢召對延英殿

嬾放二首呈劉夢得吳方之

青衣報平旦呼我起盥櫛今早天氣寒郎君應不出又
無賓客至何以銷閒日已向微陽前煖酒開詩帙

朝憐一牀日暮愛一爐火牀暖日高眠爐溫夜深坐雀
羅門嬾出鶴髮頭慵裹除却劉與吳何人來問我

六十六

病知心力減老覺光陰速五十八歸來今年六十六鬢

絲千萬白池草八九綠
童稚盡成人園林半喬木
倚高石引水穿深竹雖有潺湲聲至今聽未足

三適贈道友

褐綾袍厚暖卧蓋行坐披紫氍毹履寬穩蹇步頗相宜
足適已忘履身適已忘衣况我心又適兼忘是與非
三適一作合為一怡怡復熙熙禪那不動處混沌未鑿時
此固不可說為君強言之

洛陽春贈劉李二賓客

齊梁格

水南冠蓋地城東桃李園雪消洛陽堰春入永通門淑
景方靄靄遊人稍喧喧年豐酒漿賤日晏歌吹繁中有
老朝客華髮暎朱軒從容三兩人藉草開一尊尊前春
可惜身外事勿論明日期何處杏花遊趙邨

洛城東有
趙邨杏花

千餘
樹

寒食

人老何所樂樂在歸鄉國我歸故園來九度逢寒食故
園在何處池館東城側四隣梨花時二月伊水色豈獨

好風土仍多舊親戚出去恣歡遊歸來聊燕息有官供
祿俸無事勞心力但恐優穩多微躬銷不得

和裴令公一日日一年年雜言見贈

一日日作老翁一年年過春風公心不以貴隔我我散
唯將閒伴公我無才能忝高秩合是人間閒散物公有
功德在生民何因得作自由身前日魏王潭上宴連夜
今日午橋池頭遊拂晨山客硯前吟待月野人尊前醉
送春不敢與公閒中爭第一亦應占得第二第三人

御定全唐詩卷四百五十二

欽定四庫全書

御定全唐詩卷四百五十三

白居易

題裴晉公女兒山刺石詩後

并序 一本此篇無此題序即題也

裴侍中晉公出討淮西時過女兒山下刺石題詩
末句云待平賊壘報天子莫指仙山示武夫果如
所言剋期平賊由是淮蔡迄今底寧殆二十年人
安生業夫嗟歎不足則詠歌之故居易作詩二百

言繼題公之篇末欲使採詩者修史者後之往來
觀者知公之功德本末前後也

何處畫功業何處題詩篇麒麟高閣上女兒小山前爾
後多少時四朝二十年賊骨化為土賊壘犁為田一從

賊壘平陳蔡民晏然騾軍成牛戶

蔡冠號騾子軍陳蔡間農驍銳者人畜牛

者呼為牛戶

鬼火變人煙生子已嫁娶種桑亦絲繭皆云公

之德欲報無由緣公今在何處守都鎮三川舊宅留永

樂新居開集賢公今在

一作

何官被衮珥貂蟬戰袍破

猶在髀肉生欲圓襟懷轉蕭灑氣力彌精堅登山不拄
杖上馬能掉鞭利澤浸入地福降昇自一作自昇天昔號天
下將今稱地上仙勿追赤松遊勿拍洪崖肩商山有遺
老可以奉周旋

洛陽有愚叟

洛陽有愚叟白黑無分別浪跡雖似狂謀身亦不拙點
檢盤中飯非精亦非糲點檢身上衣無餘亦無闕天時
方得所不寒復不熱體氣正調和不飢仍不渴閒將酒

壺出醉向人家歇野食或烹鮮寓眠多擁褐抱琴榮啟
樂荷鋪劉伶達放眼看青山任頭生白髮不知天地內
更得幾年活從此到終身盡為閒日月

飽食閒坐

紅粒陸渾稻白鱗伊水魴庖童呼我食飯熟魚鮮香筋
筋適我口匙匙充我腸八珍與五鼎無復心思量捫腹
起盥漱下階振衣裳繞庭一作亭行數匝却上簷下牀箕
踞擁裘坐半身在日暘可憐飽暖味誰肯來同嘗是歲

太和入兵銷時漸康朝廷重經術草澤搜賢良堯舜求
理切夔龍啟沃忙懷才抱智者無不走遑遑唯此不才
叟頑慵戀洛陽飽食不出門閒坐不下堂子弟多寂寞
僮僕少精光衣食雖充給神意不揚揚為爾謀則短為
吾謀甚長

閒居自題

門前有流水牆上多高樹竹逕繞荷池縈迴百餘步波
閒戲魚鰲風靜下鷗鷺寂無城市喧渺有江湖趣吾廬

在其上偃卧朝復暮洛下安一居山中亦慵去時逢過
客愛問是誰家住此是白家翁閉門終老處

覽鏡喜老

今朝覽明鏡鬚鬢盡成絲行年六十四安得不衰羸親
屬惜我老相顧興歎咨而我獨微笑此意何人知笑罷
仍命酒掩鏡捋白髭爾輩且安坐從容聽我詞生若不
足戀老亦何足悲生若苟可戀老即生多時不老即須
夭不夭即須衰晚衰勝早夭此理決不疑古人亦有言

浮生七十稀我今欠六歲多幸或庶幾儻得及此限何
羨榮啟期當喜不當歎更傾酒一卮

風雪中作

歲暮風動地夜寒雪連天老夫何處宿暖帳溫爐前兩
重褐綺衾一領花茸一作叢 瓊粥熟呼不起日高安穩眠

是時心與身了無閒事牽以此度風雪閒居來六年忽
思遠遊客復想早朝士跼凍侵夜行凌寒未明起心為
身君父身為心臣子不得身自由皆為心所使我心既

知足我身自安止方寸語形骸吾應不負爾

對琴酒

西窗明且暖晚坐卷書帷
琴匣拂開後酒瓶添滿時
角尊白螺酸玉軫黃金徽
未及彈與酌相對已依依
泠泠秋泉韻貯在龍鳳池
油油春雲心一栢可致之
自古有琴酒得此味者稀
祇因康與籍及我三心知

雪中晏起偶詠所懷兼呈張常侍韋庶子皇甫

郎中

雜言

窮陰蒼蒼雪雰雰雪深沒脛泥埋輪東家典錢歸礙夜
南家貰米出凌晨我獨何者無此弊複帳重衾暖若春
怕寒放嬾不肯動日高眠足方頻伸瓶中有酒爐有炭
甕中有飯庖有新奴溫婢飽身晏起致茲快活良有因
上無臯陶伯益廊廟材的不能匡君輔國活生民下無
巢父許由箕潁操又不能食薇飲水自苦辛君不見南
山悠悠多白雲又不見西京一作北闕浩浩唯紅塵紅塵開
熱白雲冷好於冷熱中間安置身三年徼倖忝洛尹兩

任優穩為商賔非賢非愚非智慧不貴不富不賤貧冉
冉老去過六十騰騰閒來經七春不知張韋與皇甫私
喚我作何如人

和裴侍中南園靜興見示

池館清且幽高懷亦如此有時簾動風盡日橋照水靜
將鶴為伴閒與雲相似何必學留侯崎嶇覓松子

春寒

今朝春氣寒自問何所欲酥煖薤白酒乳和地黃粥豈

惟厭饒口亦可調病腹助酌有枯魚佐餐兼旨蓄省躬
念前哲醉飽多慚忸君不聞靖節先生尊長空廣文先
生飯不足

菩提寺上方晚望香山寺寄舒員外

晚登西寶刹晴望東精舍反照轉樓臺輝輝似圖畫冰
浮水明滅雪壓松偃亞石閣僧上來雲汀雁飛下西京
開於市東洛閒如社曾憶舊遊無香山明月夜

二月一日作贈韋七庶子

園杏紅萼坼庭蘭紫芽出不覺春已深今朝二月一去
冬病瘡痂將養遵醫術今春入道場清淨依僧律嘗聞
聖賢語所慎齋與疾遂使愛酒人停杯一百日明朝二
月二疾平齋復畢應須挈一壺尋花覓韋七

犬鷲

晚來天氣好散步中門前門前何所有偶覩犬與鷲
飽凌風飛犬暖向日眠腹舒穩貼地翅凝去聲高摩天上
無羅弋憂下無羈鎖牽見彼物遂性我亦心適然心適

復何為一詠逍遙篇此仍著於適

一作迹

尚未能忘言

夢劉二十八因詩問之

昨夜夢夢得初覺思踟躕忽忘來汝郡猶疑在吳都吳
都三千里汝郡二百餘非夢亦不見近與遠何殊尚能
齊近遠焉用論榮枯但問寢與食近日兩何如病後能
吟否春來曾醉無樓臺與風景汝又何如蘇相思一相
報勿復慵為書

閒吟

貧窮汲汲求衣食富貴營營役心力人生不富即貧窮
光陰易過閒難得我今幸在窮富間雖在朝廷不入山
看雪尋花翫風月洛陽城裏七年閒

西行

衣裘不單薄車馬不羸弱藹藹三月天閒行亦不惡壽
安流水館硤石青山郭官道柳陰陰行宮花漠漠常聞
俗間語有錢在處樂我雖非富人亦不苦寂寞家僮解
弦管騎從攜柸杓時向春風前歇鞍開一酌

東歸

翩翩平肩輿

一作昇

中有醉老夫膝上展詩卷竿頭懸酒

壺食宿無定程僕馬多緩驅臨水歇半日望山傾一盃

藉草坐嵬峩

並上聲

攀花行踟躕風將景共暖體與心同

舒始悟有營者居家如在途方知無繫者在道如安居

前夕宿三堂

三堂在虢

今旦遊申湖

申湖在陝

殘春三百里送我

歸東都

途中作

早起上肩舁

一作與

一杯平旦醉晚憩下肩舁一覺殘春

睡身不經營物心不思量事但恐綺與里只如吾氣味

小臺

新樹低如帳小臺平似掌六尺白藤牀一莖青竹杖風
飄竹皮落落苔印鶴迹上幽境與誰同閒人自來往

睡後茶興憶楊同州

昨晚飲太多鬼我

並上聲

連宵醉今朝餐又飽爛漫移時

睡睡足摩挲眼眼前無一事信脚繞池行偶然得幽致

娑娑綠陰樹斑駁青苔地此處置繩牀傍邊洗茶器白
瓷甌甚潔紅爐炭方熾沫下麴塵香花浮魚眼沸盛來
有佳色嚙罷餘芳氣不見楊幕巢誰人知此味

題文集櫃

破柏作書櫃櫃牢栢復堅收貯誰家集題云白樂天我
生業文字自幼及老年前後七十卷小大三千篇誠知
終散失未忍遽棄捐自開自鎖閉置在書帷前身是鄧
伯道世無王仲宣只應分付女留與外孫傳

早熱二首

彤雲散不雨赫日吁可畏端坐猶揮汗出門豈容易忽
思公府內青衫折腰吏復想驛路中紅塵走馬使征夫
更辛苦逐客彌顛顚日入尚趨程宵分不遑寐安知北
窗叟偃卧風颯至簟拂碧龍鱗扇搖白鶴翅豈唯身所
得兼示心無事誰言苦熱天元有清涼地

勃勃早塵氣炎炎赤日光飛禽颺將墜行人渴欲狂壯
者不耐飢飢火燒其腸肥者不禁熱喘急汗如漿此時

方自悟老瘦亦何妨肉輕足健逸髮少頭清涼薄食不
飢渴端居省衣裳數匙梁飯冷一領綃衫香持此聊過
日焉知畏景長

偶作二首

戰馬春放歸農牛冬歇息何獨徇名人終身役心力來
者殊未已去者不知還我今悟已晚六十方退閒猶勝
不悟者老死紅塵間

名無高與卑未得多健羨事無小與大已得多厭賤如

此常自苦反此或自安此理知甚易此道行甚難勿信人虛語君當事上看

池上作

西溪南潭皆池中勝地也

西溪風生竹森森南潭萍開水沈沈叢翠萬竿湘岸色
空碧一泊松江心浦派縈迴誤遠近橋島向背迷窺臨
澄瀾方丈若萬頃倒影咫尺如千尋泛然獨遊邈然坐
坐念行心思古今菟裘不聞有泉沼西河亦恐無雲林
豈如白翁退老地樹高竹密池塘深華亭雙鶴白矯矯

太湖四石青岑岑眼前盡日更無客膝上此時唯有琴
洛陽冠蓋自相索誰肯來此同抽簪

何處堪避暑

何處堪避暑林間背日樓何處好追涼池上隨風舟日
高飢始食食竟飽還遊遊罷睡一覺覺來茶一甌眼明
見青山耳醒聞碧流脫襪閒濯足解巾快搔頭如此來
幾時已過六七秋從心至百骸無一不自由拙退是其
分榮耀非所求雖被世間笑終無身外憂此語君莫怪

靜思吾亦愁如何三伏月楊尹謫虔州

詔下

昨日詔下去罪人今日詔下得賢臣進退者誰非我事
世間寵辱常紛紛我心與世兩相忘時事雖聞如不聞
但喜今年飽飯吃洛陽禾稼如秋雲更傾一尊歌一曲
不獨忘世兼忘身

七月一日作

七月一日天秋生履道里閒居見清景高興從此始林

間暑雨歇池上涼風起橋竹碧鮮鮮岸莎青靡靡蒼然
古磐石清淺平流水何言中門前便是深山裏雙僮侍
坐卧一杖扶行止飢聞麻粥香渴覺雲湯美胡麻粥雲母湯
平生所好物今日多在此此外更何思市朝心已矣

開襟

開襟何處好竹下池邊地餘熱體猶煩早涼風有味黃
萎槐藥結紅破蓮芳一作房墜無奈每年秋先來入哀思

自賓客遷太子少傅分司

頭上漸無髮耳間新有毫形容逐日老官秩隨年高優
饒又加俸閒穩仍分曹飲食免藜藿居處非蓬蒿何言
家尚貧銀榼提綠醪勿謂身未貴金章照紫袍誠合知
止足豈宜更貪饕然一作默然一作心自問於國有何勞

自在

杲杲冬日光明暖真可愛移榻向陽坐擁裘仍解帶小
奴捷我足小婢搔我背自問我為誰胡然獨安泰安泰
良有以與君論梗概心了事未了飢寒迫於外事了心

未了念慮煎於內我今實多幸事與心和會內外及中間了然無一礙所以日陽中向君言自在

詠史

九年十一月作

秦磨利刀斬李斯齊燒沸鼎烹酈其可憐黃綺入商洛閒卧白雲歌紫芝彼為道醺机上盡此為鸞皇天外飛去者逍遙來者死乃知禍福非天為

因夢有悟

一作寤

交友淪歿盡悠悠勞夢思平生所厚者昨夜夢見之夢

中幾許事枕上無多時款曲數杯酒從容一局碁

碁酒皆夢

中所見事初見是

一作

韋尚書

弘景

金紫何輝輝中遇李侍郎

建

笑言甚怡怡終為崔常侍

亮

意色苦依依一夕三改變

夢心不驚疑此事人盡怪此理誰得知我粗知此理聞
於竺乾師識行妄分別智隱迷是非若轉識為智菩提
其庶幾

春遊

上馬臨出門出門復逡巡迴頭問妻子應怪春遊頻誠

知春遊頻其奈老大身朱顏去復去白髮新更新請君
屈十指為我數交親大限年一作言百歲幾人及七旬我
今六十五走若下坂輪假使得七十祇有五度春逢春
不遊樂但恐是癡人

題天竺南院贈閒元旻清四上人

雜芳澗草合繁綠巖樹新山深景候晚四月有餘春竹
寺過微雨石逕無纖塵白衣一居士方袍四道人地是
佛國土人非俗交親城中山下別相送亦殷勤

哭師臯

南康丹旆引魂迴洛陽籃舁送葬來北邙原邊尹村

一作

草樹畔月苦煙愁夜過半妻孥兄弟號一聲十二人腸一

時斷往者何人送者誰樂天哭別師臯時平生分義向

人盡今日哀冤唯我知我知何益徒垂淚籃輦迴竿馬

迴轡何日重聞掃市歌誰家收得琵琶伎

師臯醉後善歌掃市詞又

有小妓工琵琶不知今落何處蕭蕭風樹白楊影蒼蒼露草青蒿氣更

就墳前哭一聲與君此別終天地

隱几贈客

宦情本淡薄年貌又老醜紫綬與金章於予亦何有有
時獨一作猶隱几音塔然無所偶卧枕一卷書起嘗一杯
酒書將引昏睡酒用扶衰朽客到忽已酣脫巾坐搔首
踈頑倚老病容恕慚交友忽思莊生言亦擬鞭其後

夏日作

葛衣踈且單紗帽輕復寬一衣與一帽可以過炎天止
於便吾體何必被羅紈宿雨林笋嫩晨露園葵鮮烹葵

炮嫩笋可以備朝餐止於適吾口何必飫腥羶飯訖盥
漱已捫腹方果然婆婆庭前步安穩窗下眠外養物不
費內歸心不煩不費用難盡不煩神易安庶幾無天閑
得以終天年

晚涼偶詠

日下西牆西風來北窗北中有逐涼人單牀獨棲息飄
蕭過雲雨搖曳歸飛翼新葉多好陰初筠有佳色幽深
小池館優穩閒官職不愛勿復論愛亦不易得

酬牛相公宮城早秋寓言見示兼呈夢得
時夢得有疾

七月中氣後金與水交爭一聞白雪唱暑退清風生碧
樹未搖落寒蟬始悲鳴夜涼枕簟滑秋燥衣巾輕疎受
老慵出劉楨疾未平何人伴公醉新月上宮城

小臺晚坐憶夢得

汲泉灑小臺臺上無纖埃解帶面西坐輕襟隨風開晚
涼閒興動憶同傾一杯月明候柴戶藜杖何時來

種桃歌

食桃種其核一年核生芽二年長枝葉三年桃有花憶
昨五六歲灼灼盛芬華迨茲八九載有減而無加去春
已稀少今春漸無多明年後年後芳意當如何命酒樹
下飲停杯拾餘葩因桃忽自感悲吒成狂歌

狂言示諸姪

世欺不識字我忝攻文筆世欺不得官我忝居班秩人
老多病苦我今幸無疾人老多憂累我今婚嫁畢心安

不移轉身泰無牽率所以十年來形神閒且逸況當垂
老歲所要無多物一裘煖過冬一飯飽終日勿言舍宅
小不過寢一室何用鞍馬多不能騎兩匹如我優幸身
人中十有七如我知足心中百無一傍觀愚亦見當
已賢多失不敢論他人狂言示諸姪

偶以拙詩數首寄呈裴少尹侍郎蒙以盛製四
篇一時酬和重投長句美而謝之

投君之文甚荒蕪數篇價直一束芻報我之章何璀璨

累累四貫驪龍珠毛詩三百篇後得文選六十卷中無
一麋麗龜絕報賽五鹿連柱難支梧高興獨因秋日盡
清吟多與好風俱銀鉤金錯兩殊重宜上屏風張座隅

御定全唐詩卷四百五十三

欽定四庫全書

御定全唐詩卷四百五十四

白居易

六年冬暮贈崔常侍晦叔

時為河南尹

鬢毛霜一色
光景水爭流
易過唯冬日
難消是老愁
香開綠蟻酒
煖擁褐綾裘
已共崔君約
尊前倒即休

戲招諸客

黃醅綠醕迎冬熟
絳帳紅爐逐夜開
誰道洛中多逸客

不將書喚不曾來

十二月二十三日作蕪呈晦叔

案頭歷日雖未盡向後唯殘六七行牀下酒瓶雖不滿
猶應醉得兩三場病身不許依年老拙宦虛教逐日忙
聞健偷閒且勤一作歡飲一杯之外莫思量

七年元日對酒五首

慶弔經過嬾逢迎跪拜遲不因時節日豈覺此身羸一作

衰時

衆老憂添歲余衰喜入春年開第七秩屈指幾多人

三杯藍尾酒一櫟膠牙錫除却崔常侍無人共我爭

今朝吳與洛相憶一欣然夢得君知否俱過本命年

余與

蘇州劉郎中同壬子歲今年六十二

同歲崔何在同年杜又無

余與吏部崔相公甲子同歲與循州杜相公及第同年秋

冬二人俱逝應無藏避處只有且歡娛

七年春題府廳

潦倒守三川因循涉四年推誠廢鉤距示耻用蒲鞭以

此稱公事將何銷俸錢雖非好官職歲久亦妨賢

早春醉吟寄太原令狐相公蘇州劉郎中

雪夜閒遊多秉燭花時整出亦提壺別來少遇新詩敵
老去難逢舊飲徒大振威名降北虜勤行惠化活東吳
不知歌酒騰騰興得似河南醉尹無

洛下送牛相公出鎮淮南

北闕至東京風光十六程坐移丞相閣春入廣陵城紅
旆擁雙節白鬚無一莖萬人開路看百吏立班迎閭外

君彌重尊前我亦榮何須身自得將相是門生

元和初牛相公

應制策登第三等
子為翰林考覈官

箏

雲髻飄蕭綠花顏旖旎紅雙眸剪秋水十指剝春蔥楚
豔為門閥秦聲是女工甲明銀玦璫柱觸玉玲瓏
媛苦

啼嫌月鶯

一作鶯

嬌語泥

一作泥

風移愁來手底送恨入弦

中趙瑟清

一作情

相似胡琴開

一作調

不同慢彈迴斷雁急

奏轉飛蓬霜珮鏘還委冰泉咽復通珠聯千拍碎刀截

一聲終倚麗精神定矜能意態融歇時情不斷休去思

無窮燈下青春夜

一作清歌夜

尊前白首翁且聽應得在老

耳未多聾

洛中春遊呈諸親友

莫歎年將暮須憐歲又新府中三遇臘洛下五逢春春

樹花珠顆春塘水麴塵春娃無氣力春馬有精神

詠春遊一

時之態

並轡鞭徐動連盤酒慢巡經過舊鄰里追逐好交

親笑語銷閒日酣歌送老身一生歡樂事亦不少於人

酬舒三員外見贈長句

自請假來多少日五旬光景似須臾已判到老為狂客
不分當春作病夫楊柳花飄新白雪櫻桃子綴小紅珠
頭風不敢多多飲能酌三分相勸無

將歸一絕

欲去公門返野扉預思泉竹已依依更憐家醞迎春熟
一甕醍醐待我歸

罷府歸舊居

自此後重授賓客歸履道宅作

陋巷乘簾入朱門挂印迴腰間拋組綬纓上拂塵埃屈
曲閒池沼無非手自開青蒼好竹樹亦是眼看栽石片
臺琴匣松枝閣酒杯此生終老處昨日却歸來

睡覺偶吟

官初罷後歸來夜天欲明前睡覺時起坐思量更無事
身心安樂復誰知

問支琴石

疑因星隕空中落歎被泥埋澗底沈天上定應勝地上

丈機未必及支琴提攜拂拭知恩否雖不能言合有心
自喜

身慵難勉強性拙易遲迴布被辰時起柴門午後開忙
驅能者去閒逐鈍人來自喜誰能會無才勝有才

裴常侍以題薔薇架十八韻見示因廣為三十
韻以和之

託質依高架攢花對小堂晚開春去後獨秀院中央霽
景朱明早芳時白晝長穠因天與色麗共日爭光剪碧

排千萼研朱染萬房煙條塗石綠粉藥撲雌一作雄黃根

動彤雲涌枝搖赤羽翔九微燈炫轉七寶帳熒煌淑氣

熏行徑清陰接步廊照梁迷藻枕耀壁變雕牆爛若聚

然火殷於葉得霜臘脂含臉笑蘇合裛衣香浹洽濡晨

露玲瓏漏夕陽合羅排勘纈醉暈淺深妝乍見疑迴面

遙看誤斷腸風朝舞飛燕雨夜泣蕭娘桃李慙無語芝

蘭讓不芳山榴何細碎石竹苦尋常蕙慘偎欄避蓮羞

映浦藏怯教蕉葉戰妬得柳花狂豈可輕嘲詠應須痛

長夜君先去殘年我幾何
秋風滿衫淚泉下故人多

池上閒詠

青莎臺上起書樓
綠藻潭中繫釣舟
日晚愛行深竹

一作

徑

裏月明多上

一作在

小橋頭
暫嘗新酒還成醉
亦出中

門便當遊一部清商聊送老
白鬚蕭颯管弦秋

涼風歎

昨夜涼風又颯然
螢飄葉墜卧牀前
逢秋莫歎須知分

已過潘安三十年

和高僕射罷節度讓尚書授少保分司喜遂遊
山水之作

整辭八座罷雙旌便作登山臨水行能以忠貞酬重任
不將富貴礙高情朱門出去簪纓從絳帳歸來歌吹迎
鞍轡閑裝光滿馬何人信道是書生

送考功崔郎中赴闕

稱意新官又少年秋涼身健好朝天青雲上了無多路
却要徐驅穩著鞭

重修香山寺畢題二十二韻以紀之

闕塞龍門口祇園鷲嶺頭曾隨滅却壞今遇勝緣修再
瑩新金剎重裝舊石樓病僧皆引起忙客亦淹留四望
窮沙界孤標出瞻州地圖鋪洛邑天柱倚松一作丘兩

面蒼蒼岸中心瑟瑟流波翻八灘雪堰護一潭油臺殿
朝彌麗房廊夜更幽千花高下塔一葉徃來舟岫合雲
初吐林開霧半收靜聞樵子語遠聽棹郎謳官散殊無
事身閒甚自由吟來攜筆硯宿去抱衾稠霽月當窗一作

軒
白涼風滿簾秋煙香封藥竈泉冷洗茶甌南祖心應
學西方社可投先宜知止足次要悟浮休覺路隨方樂
迷塗到老愁須除愛名障莫作戀家囚便合窮年住何
言竟日遊可憐終老地此是我菟裘

送楊八給事赴常州

無嗟別青瑣且喜擁朱輪五十得三品百千無一人須
勤念黎庶莫苦憶交親此外無過醉毗陵何限春

聞歌者唱徵之詩

新詩絕筆聲名歇
舊卷生塵篋
筭深時向歌中聞
一句未容傾耳已傷心

醉送李二十常侍赴鎮浙東

靖安客舍花枝下
共脫青衫典濁醪
今日洛橋還醉別
金杯翻汗麒麟袍
喧闐夙駕君脂轄
酩酊離筵我藉糟
好去商山紫芝伴
珊瑚鞭動馬頭高

醉別程秀才

五度龍門點額迴
却緣多藝復多才
貧泥客路粘難出

愁鎖鄉心掣不開何必更遊京國去不如且入醉鄉來

吳弦楚調瀟湘弄為我殷勤送一杯

程生善琴尤能沈湘曲

自詠

白衣居士紫芝仙半醉行歌半坐禪今日維摩兼飲酒
當時綺季不請平聲錢等閒池上留賓客隨事燈前有管
弦但問此身銷得否分司氣味不論年

把酒思閒事二首

把酒思閒事春愁誰最深乞錢羈客面落第舉人心月

下低眉立燈前抱膝吟憑君勸一醉勝與萬黃金
把酒思閒事春嬌何處多試鞍新白馬弄鏡小青娥掌
上初教舞花前欲按歌憑君勸一醉勸了問如何

衰荷

白露凋花花不殘涼風吹葉葉初乾無人解愛蕭條境
更繞衰蘂一匝看

池上送考功崔郎中兼別房實二妓

文昌列宿徵還日洛浦行雲放散時鵷鷺上天花逐水

無因

一作由

再會白家池

自問

依仁臺廢悲風晚履信池荒宿草春

晦叔亭臺在依仁微之池館在履信

自問老身騎馬出洛陽城裏覓何人

送陳許高僕射赴鎮

敦詩說禮中軍帥重士輕財大丈夫常與師徒同苦樂

不教親故隔榮枯花鈿坐繞黃金印絲管

一作竹

行隨白

玉壺商皓老狂唯愛醉時時能寄酒錢無

青氊帳二十韻

合聚千年

一作年

毳施張百子卷

司馬遷書云張空卷

骨盤遶柳健

色染塞藍鮮北製因戎初南移逐虜遷汰

音聞

風吹不動

禦雨濕彌堅有頂中央聳無隅四嚮圓傍通門豁爾內

密氣溫然遠別關山外初安庭戶前影孤明月夜價重

苦寒年軟煖圍氊毯鎗撻束管弦最宜霜後地偏稱雪

中天側置低歌坐平鋪小舞筵閒多揭簾入醉便擁袍

眠鐵檠

去聲

移燈背銀囊帶火懸深藏曉蘭焰闇貯宿香

煙獸炭休親近狐裘可棄捐
硯溫融凍墨瓶煖變春泉
蕙帳徒招隱茅庵浪坐禪
貧僧應歎羨寒士定留連
賓客於中接兒孫
向後傳王家誇舊物未及此青氊

王子敬語

偷兒云青氊我家舊物

答夢得秋日書懷見寄

幸免非常病甘當本分衰
眼昏燈最覺腰瘦帶先知
樹葉霜紅日髭鬚雪白時
悲愁緣欲老老過却無悲

同諸客題于家公主舊宅

平陽舊宅少人遊，應是遊人到即愁。
一作春布穀鳥啼桃

李院絡絲蟲，怨鳳皇樓臺傾滑石。
猶殘砌簾斷珍珠不

滿鉤，聞道至今蕭史在。
一作韶州鬢雪白向明

答夢得八月十五日夜翫月見寄

南國碧雲客，東京白首翁。
一作上月松江初有月，伊水正無

風。遠思兩鄉斷，清光千里同。
不知娃館上，何似石樓中。

其夜余在龍門石樓上望月

初冬早起寄夢得

起戴烏紗帽行披白布裘爐溫先煖酒手冷未梳頭早
起一作景煙霜白初寒鳥雀愁詩成遣誰和還是寄蘇州

秋夜聽高調涼州

樓上金風聲漸緊月中銀字韻初調促張弦柱吹高管
一曲涼州入沈寥

香山寺二絕

空山寂靜老夫閒伴鳥隨雲往復還家醞滿瓶書滿架
半移生計入香山

愛風巖上攀松蓋戀月潭邊坐石一作住稜且共雲泉結
緣境他生當作此山僧

送舒著作重授省郎赴闕

三歲相依在洛都遊花宴月飽歡娛惜別笙歌多怨咽
願留軒蓋少踟躕劍磨光彩依前出鵬舉風雲逐後驅
從此求閒應不得更能重醉白家無

同諸客嘲雪中馬上妓

珊瑚鞭韉馬踟躕引手低蛾索一盃腰為逆風成弱柳

面因衝冷作凝酥銀篦穩簪去聲烏紗帽花檐宜乘叱撥
駒雪裏君看何所似王昭君妹寫真圖

喜劉蘇州恩賜金紫遙相賀宴以詩慶之

海內姑蘇太守賢恩加章綬豈徒然賀賓喜色欺杯酒
醉妓歡聲過管弦魚珮葺鱗光照地鵲銜瑞帶勢衝天
莫嫌鬢上些些白金紫由來稱長年

藍田劉明府攜酌

一作酌

相過與皇甫郎中卯時

同飲醉後贈之

臘月九日煖寒客卯時十分空腹杯玄晏舞狂烏帽落
藍田醉倒玉山顏貌偷花色老慙去歌蹋柳枝春闇來
不為劉家聖賢物愁翁笑口大難開

劉蘇州以華亭一鶴遠寄以詩謝之

老鶴風姿異衰翁詩思深素毛如我鬢丹頂似君心松
際雪相映雞羣塵不侵殷勤遠來意一隻重千金

早春憶蘇州寄夢得

吳苑四時風景好就中偏好是春天霞光曙後殷於火

水色晴來嫩似煙
士女笙歌宜月下
使君金紫稱花前
誠知歡樂堪留戀
其奈離鄉已四年

嘗新酒憶晦叔二首

尊裏看無色
杯中動有光
自君拋我去
此物共誰嘗
世上強欺弱
人間醉勝醒
自君拋我去
此語更誰聽

負春

病來道士教調氣
老去山僧勸坐禪
孤負春風楊柳曲
去年斷酒到今年

池上閒吟二首

高卧閒行自在身
池邊六見柳條新
幸逢堯舜無爲日
得作羲皇向上人
四皓再除猶且健
三州罷守未全貧
莫愁客到無供給
家醞香濃野菜春

非莊非宅非蘭若
竹樹池亭十畝餘
非道非僧非俗吏
褐裘烏帽閉門居
夢遊信意寧殊蝶
心樂身閒便是魚
雖未定知生與死
其間勝負兩何如

早春招張賓客

久雨初晴天氣新
風煙草樹盡欣欣
雖當冷落衰殘日
還有陽和暖活身
池色溶溶藍染水
花光燄燄火燒春
商山老伴相收拾
不用隨他年少人

營閒事

自笑營閒事從朝到日斜
澆畦引泉脉掃徑避蘭芽
暖變牆衣色晴催木筆花
桃根知酒渴晚送一甌茶

感春

老思不禁春風光照眼
新花房紅鳥觜池浪碧
魚鱗倚

櫂誰為伴持杯自問身心情多少在六十二三人

春池上戲贈李郎中

滿池春水何人愛唯我迴看指似君直似授藍新汁色
與君南宅染羅裙

翫半開花贈皇甫郎中

八年寒食日池
東小樓上作

勿訝春來晚無嫌花發遲人憐全盛日我愛半開時紫
蠟粘為蒂紅蘇點作粧成都新夾纈梁漢碎臙脂樹杪
真珠顆牆頭小女兒淺深妝駁落高下火參差蝶戲爭

香朶鶯啼選穩枝好教郎作伴合共酒相隨醉翫無勝
此狂嘲更讓誰猶殘少年興不似一作未是老人詩西日憑
輕照東風莫殺去聲吹明朝應爛漫後夜更一作即離披林
下遙相憶尊前聞有期銜杯嚼蘂思唯我與君知

池邊

柳老香絲宛荷新鈿扇圓殘春深樹裏斜日小樓前醉
遣收杯杓閒聽理管弦池邊更無事看補採蓮船

家釀新熟每嘗輒醉妻姪等勸令少飲因成長

句以諭之

君應怪我朝朝飲不說向君君不知身上幸無疼痛處
甕頭正是撇嘗時劉妻勸諫夫休醉王姪分疎叔不癡
六十三翁頭雪白假如醒點欲何為

送常秀才下第東歸

東歸多旅恨西上少知音寒食看花眼春風落第心百
憂當二月一醉直千金到處公卿席無辭酒醖深

且遊

手裏一杯滿心中百事休春應唯仰醉老更不禁愁弄
水迴船尾尋花信馬頭眼看筋力減遊得且須遊

題王家莊臨水柳亭

弱柳緣堤種虛亭壓水開條疑逐風去波欲上階來翠
羽偷魚入紅腰學舞迴春愁正無緒爭不盡殘杯

題令狐家木蘭花

膩如玉指塗朱粉光似金刀剪紫霞從此時時春夢裏
應添一樹女郎花

拜表迴閒遊

玉珮金章紫花綬
紵衫藤帶白綸巾
晨興拜表稱朝士
晚出遊山作野人
達磨傳心令息念
玄元留意遣同塵
八關淨戒齋銷日
一曲狂歌醉送春
酒肆法堂方丈裏
其間豈是兩般身

西街渠中種蓮壘石頗有幽致偶題小樓

朱檻低牆上清流
小閣前庭人栽菡
萏買石造潺湲影
落江心月聲移谷
口泉閒看捲簾坐
醉聽掩窗眠路笑

淘官水家愁費料錢是非君莫問一對一條然

晚春閒居楊工部寄詩楊常州寄茶同到因以
長句荅之

宿醒寂寞眠初起春意闌珊日又斜勸我加餐因早笋
恨人休醉是殘花悶吟工部新來句渴飲毗陵遠到茶
兄弟東西官職冷門前車馬向誰家

玉泉寺南三里澗下多深紅躑躅繁豔殊常感
惜題詩以示遊者

玉泉南澗花奇怪不似花叢似火堆今日多情唯我到
每年無故為誰開寧辭辛苦行三里更與留連飲兩杯
猶有一般辜負事不將歌舞管弦來

早服雲母散

曉服雲英漱井華寥然身若在煙霞藥銷日晏三匙飯
酒渴春深一碗茶每夜坐禪觀水月有時行醉翫風花
淨名事理人難解身不出家心出家

三月晦日

一下又有日字

晚聞鳥聲

晚來林鳥語殷勤似惜風光說向人遣脫破袍勞報煖
催沽美酒敢辭貧聲聲勸醉應須醉一歲唯殘半日春
早夏遊平原迴

夏早日初長南風草木香肩輿頗平穩澗路甚清涼紫
蕨行看採青梅旋摘嘗療飢魚解渴一醺冷雲漿

宿天竺寺迴

野寺經三宿都城復一還家仍念婚嫁身尚繫官

一作朝

班蕭灑秋臨水沈吟晚下山長閒猶未得逐日且偷閒

侍中晉公欲到東洛先蒙書問期宿龍門思往

感今輒獻長句

昔蒙興化池頭送

太和三年春居易授賓客分司東來特蒙侍中於興化池上宴送今

許龍門潭上期聚散但慙長見念榮枯安敢道相思功
成名遂來雖久雲卧山遊去未遲聞說風情筋力在只
如初破蔡州時

奉和晉公侍中蒙除留守行及洛師感悅發中

斐然成詠之作

鸞鳳翱翔在寥廓
貂蟬蕭灑出埃塵
致成堯舜昇平代
收得夔龍強健身
拋擲功名還史冊
分張歡樂與交親
商山老皓雖休去
終是留侯門下人

送劉五司馬赴任硤州兼寄崔使君

位下才高多怨天
劉兄道勝獨恬然
貧於揚子兩三倍
老過榮公六七年
筆硯莫拋留壓案
簞瓢從陋也銷錢
郡丞自合當優禮
何況夷陵太守賢

菩提寺上方晚眺

樓閣高低樹淺深山光水色暝沈沈
嵩煙半卷青綃幕
伊浪平鋪綠綺衾
飛鳥滅時宜極目
遠風來處好開襟
誰知不離簪纓內
長得逍遙自在心

楊柳枝詞八首

六么水調家家唱
白雪梅花處處吹
古歌舊曲君休聽
聽取新翻楊柳枝

陶令門前四五樹
亞夫營裏百千條
何似東都正二月
黃金枝映洛陽橋

依依裊裊復青青句引春

一作清

風無限情白雪花繁空

撲地綠絲條弱不勝鶯

紅板江橋青酒旗館娃宮暖日斜時可憐雨歇東風定

萬樹千條各自垂

蘇州楊柳任君誇更有錢塘勝館娃若解多情尋小小

綠楊深處是蘇家

蘇家小女舊知名楊柳風前別有情剝條盤作銀環樣

卷葉吹為玉笛聲

葉含濃露如啼眼
枝裊輕風似舞腰
小樹不禁攀折苦
乞君留取兩三條

人言柳葉似愁眉
更有愁腸似柳絲
柳絲挽斷腸牽斷
彼此應無續得期

御定全唐詩卷四百五十四

欽定四庫全書

御定全唐詩卷四百五十五

白居易

讀老子

言者不如

一作知

知者默此語吾聞於老君若道老君是

知者緣何自著五千文

讀莊子

莊生齊物同歸一我道同中有不同遂性逍遙雖一致

鸞凰終校勝蛇蟲

萬首絕句作去國辭家謫異方中心自怪少憂傷為尋莊子知歸處認得

無何是本鄉

讀禪經

須知諸相皆非相若住無餘却有餘言下忘言一時了

夢中說夢兩重虛空花豈得兼求果陽

一作物

燄如何更

覓魚攝動是禪禪是動不禪不動即如如

感興二首

吉凶禍福有來由但要深知不要憂只見火光燒潤屋

不聞風浪覆虛舟名為公器無多取利是身災合少求
雖異匏瓜難不食大都食足早宜休

魚能深入寧憂釣鳥解高飛豈觸羅網熱處先爭炙手去
悔時其奈噬臍何尊前誘得猩猩血幕上偷安鷺鷥窠
我有一言君記取世間自取苦人多

問鶴

烏鷺爭食雀爭窠獨立池邊風雪多盡日跼冰翹一足
不鳴不動意如何

代鶴答

鷹爪攫雞雞肋折鵲拳
鷺雁頭垂何如斂翅水邊立
飛上雲松棲穩枝

閒卧

一作居

有所思二首

向夕褰簾卧枕琴微涼入戶起
開襟偶因明月清風夜
忽想遷臣逐客心何處投荒初
恐懼誰人繞澤正悲吟
始知洛下分司坐一日安閒直萬金

權門要路是

一作足

身災散地閒居少禍胎今日憐君嶺

南去當時笑我洛中來
蟲全性命緣無毒木盡
天為不才大抵吉凶多
自致李斯一去二疎迴

喜閒

蕭灑伊嵩下優游黃綺間
未曾一日悶已得六年閒
魚鳥為徒侶煙霞是往還
伴僧禪閉目迎客笑開顏
興發宵遊寺慵時晝掩關
夜來風月好悔不宿香山

詩酒琴人例多薄命予
酷好三事雅當此科而
所得已多為幸斯甚偶
成狂詠聊寫媿懷

愛琴愛酒愛詩客多賤多窮多苦辛中散步兵終不貴
孟郊張籍過於貧一之已歎關於命三者何堪併在身
只合飄零隨草木誰教凌厲出風塵榮名厚祿二千石
樂飲閒遊三十春何得無厭時咄咄猶言薄命不如人

寄明州于駙馬使君三絕句

有花有酒有笙歌其奈難逢親故何近海饒風春足雨
白鬚太守悶時多

平陽音樂隨都尉留滯三年在浙東吳越聲邪無法用

莫教偷入管弦中

何郎小妓歌喉好嚴老呼為一串珠

嚴尚書與于駙馬詩云莫惜歌喉一

串珠海味腥鹹損聲氣聽看猶得斷腸無

閒卧

薄食當齋戒散班同隱淪佛容為弟子天許作閒人唯
置牀臨水都無物近身清風散髮卧兼不要紗巾

春早秋初因時即事兼寄浙東李侍郎

春早秋初晝夜長可憐天氣好年光
和風細動簾帷暖

清露微凝枕簟涼窗下曉眠初減被池邊晚坐乍移牀
閒從蕙草侵堦綠靜任槐花滿地黃理曲管弦聞後院
熨衣燈火映深房四時新景一作境何人別遙憶多情李
侍郎

新秋喜涼

過得炎蒸月尤宜老病身衣裳朝不潤枕簟夜相親樓
月纖纖早波風裊裊新光陰與時節先感是詩人

初夏閒吟兼呈韋賓客

孟夏清和月東都閒散官體中無病痛眼下未飢寒世
事閒常悶交遊見即歡杯觴留客切妓樂取人寬雪鬢
隨身老雲心著處安此中殊有味試說向君看

哭崔二十四常侍

崔好酒放歌忘懷生死
知疾不起自為誌文

貂冠初別九重門馬鬣新封四尺墳薤露歌詞非白雪
旌銘官爵是浮雲伯倫每置隨身鍤元亮先一作初為自

祭文莫道高風無繼者一千年內有崔君

奉酬侍中夏中雨後遊城南莊見示八韻

島樹間林巒雲收雨氣殘四山嵐色重五月水聲寒老
鶴兩三隻新篁千萬竿化成天竺寺移得子陵灘心覺
閒彌貴身緣健更歡帝將風后待人作謝公看角里年
雖老高陽興未闌佳晨不見召爭免趁杯盤

來詩云何處趁杯盤

送兗州崔大夫駙馬赴鎮

唐人絕句作送崔駙馬赴兗州

戚里誇為賢駙馬儒家認作好詩人魯侯不得辜風景
沂水年年有暮春

少年問

少年怪我問如何
何事朝朝醉復歌
號作樂天應不錯
憂愁時少樂時多

問少年

千首詩堆青玉案
十分酒寫白金盃
迴頭却問諸年少
作箇狂夫得了無

代琵琶弟子謝女師曹供奉寄新調弄譜

琵琶師在九重城
忽得書來喜且驚
一紙展看非舊譜
四弦翻出是新聲
絃賓掩抑嬌多怨
散水玲瓏峭更清

珠顆淚霑金捍撥紅妝弟子不勝情

繼賓散水
皆新調名

代林園戲贈

襄侍中新修集賢宅成池館
甚盛數往遊宴醉歸自戲耳

南院今秋遊宴少西坊近日往來頻
假如宰相池亭好作客何如作主人

戲荅林園

豈獨西坊來往頻偷閒處處作遊人
衡門雖是棲遲地不可終朝鏤老身

重戲贈

集賢池館從他盛履道林亭勿自輕往往歸來嫌窄小
年年為主莫無情

重戲荅

小水低亭自可親大池高館不關身林園莫妬裴家好
憎故憐新豈是人

早秋登天宮寺閣贈諸客

天宮閣上醉蕭辰絲管閒聽酒慢巡為向涼風清景道
今朝屬我兩三人

晚上天津橋

一作閨

閒望偶逢盧郎中張員外攜

酒同傾

上陽宮裏晚鐘後天津橋頭殘月前空濶境疑非下界
飄飄身似在寥天星河隱映初生日樓閣蔥蘢半出煙
此處相逢傾一醺始知地上有神仙

八月十五日夜同諸客翫月

月好共傳唯此夜境閒皆道是東都嵩山表裏千重雪
洛水高低兩顆珠清景難逢宜愛惜白頭相勸強歡娛

誠知亦有來年會保得清明強健無

對晚開夜合花贈皇甫郎中

移晚校一月花遲過半年紅開杪秋日翠合欲昏天白

露滴未

一作不

死涼風吹更鮮後時誰肯顧唯我與君憐

醉遊平泉

狂歌箕踞酒尊前眼不看人面向天
洛客最閒唯有我
一年四度到平泉

題贈平泉韋徵君拾遺

箕潁千年後唯君得古風位留丹陛上身入白雲中躁
靜心相背高低跡不同籠雞與梁燕不信有冥鴻

酬皇甫郎中對新菊花見憶

愛菊高人吟逸韻悲秋病客感衰懷黃花助興方攜酒
紅葉添愁正滿階居士暈腥今已斷仙郎杯杓為誰排
媿君相憶東籬下擬廢重陽一日齋

夜宴醉後留獻裴侍中

九燭臺前十二姝主人留醉任歡娛翩翩舞袖雙飛蝶

宛轉歌聲一索珠坐久欲醒還酩酊夜深初散又踟躕
南山賓客東山妓此會人間曾有無

和韋庶子遠坊赴宴未夜先歸之作兼呈裴員

外員外亦愛
先逃歸

促席留歡日未曛遠坊歸思已紛紛無妨按轡行乘月
何必逃杯走似雲銀燭忽一作忽拋楊柳曲金鞍潛送石
榴裙到時常晚歸時早笑樂三分校一分

集賢池荅侍中問

主人晚入皇城宿問客裴回何所須池月幸閒無用處
今宵能借客遊無

楊柳枝二十韻

并序

楊柳枝洛下新聲也洛之小妓有善歌之者詞章
音韻聽可動人故賦之

小妓攜桃葉新聲蹋柳枝妝成剪燭後醉起舞衫時繡
履嬌行緩花筵笑上遲身輕委迴雪羅薄透凝脂笙引
簧頻煖箏催柱數移樂童翻怨調才子與妍詞便想人

如樹先將髮比絲風條搖兩帶煙葉貼雙眉口動櫻桃
破鬟低翡翠垂枝柔腰嫋娜羨嫩手葳蕤唳鶴晴呼侶
哀猿夜叫兒玉敲音歷歷珠貫字累累袖為收聲點釵
因赴節遺重重遍頭別一一拍心知塞北愁攀折江南
苦別離黃遮金谷岸綠映杏園池春惜芳華好秋憐顏
一作翠色衰取來歌裏唱勝向笛中吹曲罷那能別情多
不自持纏頭無別物一首斷腸詩

谷皇甫十郎中秋深酒熟見憶

煙景冷蒼茫秋深夜夜霜為思池上酌先覺甕頭香未
暇傾巾漉還應染指嘗醍醐慙氣味琥珀讓晶光若許
陪歌席須容散道場月終齋戒畢猶及菊花黃

老去

老去媿妻兒冬來有勸詞煖寒從飲酒衝冷少吟詩戰
勝心還壯齋勤體校羸由來世間法損益合相隨

送宗實上人遊江南

忽辭洛下緣何事擬向江南住幾時每過渡一作船頭應

傷一作問法無妨菩薩是船師

和同州楊侍郎誇柘枝見寄

細吟馮翊使君詩憶作餘杭太守時君有一般輸我事
柘枝看校十年遲

冬初酒熟二首

霜繁脆庭柳風利剪池荷月色曉彌苦鳥聲寒更多秋
懷久寥落冬計又如何一甕新醅酒萍浮春水波

酒熟無來客因成獨酌謠人間老黃綺地上散松喬忽

忽醒還醉悠悠暮復朝殘年多少在盡付此中銷

送姚杭州赴任因思舊遊二首

與君細話杭州事為我留心莫等閒
閭里固宜勤撫恤樓臺亦要數躋攀
笙歌縹緲虛空裏風月依稀夢想間
且喜詩人重管領遙飛一醖賀江山

渺渺錢唐路幾千想君到後事依然
靜逢竺寺猿偷橘閒看蘇家女採蓮
故妓數人憑問訊新詩兩首倩留傳
舍人雖健無多興老校當時八九年

杭民至今呼
余為白舍人

寄李相公

漸老只謀歡
雖貧不要官
唯求造化力
試為駐春看

冬日平泉路晚歸

山路難行日易斜
煙村霜樹欲棲鴉
夜歸不到應閒事
熱飲三杯即是家

利仁北街作

草色斑斑春雨晴
利仁坊北面西行
踟躕立馬緣何事
認得張家歌吹聲

洛陽堰閒行

洛陽堰上新晴日長夏門前欲暮春
遇酒即沽逢樹歇
七年此地作閒人

過永寧

村杏野桃繁似雪行人不醉為誰開
賴逢山縣盧明府
引我花前勸一杯

往年稠桑曾喪白馬題詩廳壁今來尚存又復
感懷更題絕句

路傍埋骨蒿草合壁上題詩塵蘚生馬死七年猶悵望
自知無乃太多情

羅敷水

野店東頭花落處一條流水號羅敷芳魂豔骨知何處
春草茫茫墓亦無

路逢青州王大夫赴鎮立馬贈別

大旆擁金羈書生得者稀何勞問官職豈不見光輝赫
赫人爭看翩翩馬欲飛不期一作欺前歲尹駐節語依依

前年春余為河南尹王為少尹

和楊同州寒食乾坑會後聞楊工部欲到知予
與工部有宿酲

夜飲歸常晚朝眠起更遲舉頭中酒後引手索茶時拂
枕青長袖欹簪白接羅宿酲無興味先是肺神知

和劉汝州酬侍中見寄長句因書集賢坊勝事
戲而問之

洛川汝海封畿接履道集賢來往頻一復時程雖不遠

百餘步地更相親

汝去洛程一宿履道集賢兩宅相去一百三十步

朱門陪宴

多投轄青眼留歡任吐茵聞道郡齋還有酒花前月下

對何人

池上二絕

山僧對碁坐局上竹陰清映竹無人見時聞下子聲

小娃撐小艇偷採白蓮迴不解藏踪跡浮萍一道開

白羽扇

素是自然色圓因裁製功颯如松起籟飄似鶴翻空盛

夏不銷雪終年無盡風引秋生手裏藏月入懷中麈尾
斑非足蒲葵陋不同何人稱相對清瘦白鬚翁

五月齋戒罷宴徹樂聞韋賓客皇甫郎中飲會
亦稀又知欲攜酒饌出齋先以長句呈謝

妓房匣鏡滿紅埃酒庫封瓶生綠苔居士爾時緣護戒
車公何事亦停杯散齋香火今朝散開素盤筵後日開
隨意往還君莫怪坐禪僧去飲徒來

閒園獨賞

因夢得所寄蜂鶴之
詠因成此篇以和之

午後郊園靜晴來景物新
雨添山氣色風借水精神
永日若為度獨遊何所親
仙禽狎君子芳樹倚佳人
蟻鬪王爭肉蝸移舍逐身
蝶雙知伉儷蜂分見君臣
蠢蠕形雖小逍遙性即均
不知鵬與鷁相去幾微塵

種柳三詠

白頭種松桂早晚見成林
不及栽楊柳明年便有陰
春風為催促副取老人心

從君種楊柳夾水意如何
準擬三年後青絲拂綠波
仍

教小樓上對唱柳枝歌

更想五年後
千千條麴塵
路傍深映月
樓上聞藏春
愁殺閒遊客
聞歌不見人

偶吟

好官病免曾三度
散地歸休已七年
老自退閒非世棄
貧蒙強健是天憐
韋荆南去留春服
王侍中来乞酒錢
便得一年生計足
與君美食復甘眠

池上即事

移牀避日依松竹，解帶當風挂薜蘿。
鈿砌池心綠蘋合，粉開花面白蓮多。
久陰新霽宜絲管，苦熱初涼入綺羅。
家醞瓶空人客絕，今宵爭奈月明多。

南塘暝興

水色昏猶白，霞光闇漸無。
風荷搖破扇，波月動連珠。
蟋蟀啼相應，鴛鴦宿不孤。
小僮頻報夜歸步，一作尚踟蹰

小宅

小宅里閭接疎籬，雞犬通渠分南巷。
水窗借北家風庾。

信園殊小陶潛屋不豐何勞問寬窄寬窄在心中

諭親友

適情處處皆安樂大抵園林勝市朝煩鬧榮華猶易過
優閒福祿更難銷自憐老大宜疎散却被交親歎寂寥
終日相逢不相見兩心相去一何遙

龍門送別皇甫澤州赴任韋山人南遊

隼旟歸洛知何日鶴駕還嵩莫過春惆悵香山雲水冷
明朝便是獨遊人

劉蘇州寄釀酒糯米李浙東寄楊柳枝舞衫偶
因嘗酒試衫輒成長句寄謝之

柳枝謾蹋試雙袖桑落初香嘗一杯金屑醅濃吳米釀
銀泥衫穩越娃裁舞時已覺愁眉展醉後仍教笑口開
慙媿故人憐寂寞三千里外寄歡來

詔授同州刺史病不赴任因詠所懷

同州慵不去此意復誰知誠愛俸錢厚其如身力衰可
憐病判案何似醉吟詩勞逸懸相遠行藏決不疑徒煩

人勸諫只合自尋思
白髮來無限青山去有期
野心惟怕閑家口莫愁飢
賣却新昌宅聊充送老資

寄楊六侍郎

時楊初授戶部
予不赴同州

西戶最榮君好去
左馮雖穩我慵來
秋風一飭鱸魚膾
張翰搖頭喚不迴

韋七自太子賓客再除祕書監以長句賀而餞

之

韋往年嘗與
予同為祕監

離筵莫愴且同歡
共賀新恩拜舊官
屈就商山伴麋鹿

好歸芸閣狎鵝鸞落星石上蒼苔古畫鶴廳前白露寒

老監姓名應

一作題

在壁相思試為拂塵看

酒熟憶皇甫十

新酒此時熟故人何日來自從金谷別不見玉山顏疎
索柳花盤寂寥荷葉杯今冬問檀帳雪裏為誰開

九年十一月二十一日感事而作

其日獨遊香山寺

禍福茫茫不可期大都早退似先知當君白首同歸日
是我青山獨往時顧索素琴應不暇憶牽黃犬定難追

麒麟作脯龍為醢何似泥中曳尾龜

即事重題

重裘暖帽寬羶履小閣低窗深地爐身穩心安眠未起
西京朝士得知無

將歸渭村先寄舍弟

一年年覺此身衰一日日知前事非詠月嘲風

一作花先

要減登山臨水亦宜稀子平嫁娶貧中畢元亮田園醉
裏歸為報阿連寒食下與君釀酒掃柴扉

看嵩洛有歎

今日看嵩洛迴頭歎世間榮華急如水憂患大於山見
苦方知樂經忙始愛閒未聞籠裏鳥飛出肯飛還

詠懷

隨緣逐處便安閒不入

一作住

朝廷不住

一作入

山心似虛

舟浮水上身同宿鳥寄林間尚平婚嫁了無累馮翊符

章封却還

時阿羅初嫁及同州官吏放歸

處分貧家殘活計匹

一作正

如

身後莫相關

詠老贈夢得

與君俱老也自問老何如
眼澀夜先卧頭慵朝未梳
有時扶杖出盡日閉門居
嬾照新磨鏡休看小字書
情於故人重迹共少年疎
唯是閒談興相逢尚有餘

